

समे – 12:25

<><><><><><>

Rath Yatra

पुरी च भगवान जगनाथ हुंदी दुनिया भरै च मशहूर सलाना रथ यात्रा अज्जै थमां शुरू होई। राष्ट्रपति द्रौपदी मुर्मू होरें पुरी दी इस पवित्र रथ यात्रा दे मौके पर सब्बने गी शुभकामनां दित्तियां। प्रधानमंत्री नरेन्द्र मोदी होरें भगवान जगनाथ हुंदी रथ यात्रा दे मौके पर सब्बने नागरिकें गी शुभकामनां दित्तियां। सोशल मीडिया दी इक पोस्ट च उनें मेद जाहर कीती जे आस्था ते शक्ति दा एह पर्व सब्बने लेई सुख, शांति, समृद्धि, खुशहाली ते नरोई सेहत लेइयै आवै।

<><><><><><>

Axiom-4

भारत नै अंतरिक्ष यात्रा च अपना इतिहास रची दित्ता ऐ जियां के एक्सियम-4 मिशन दे तैहत चरुं जनें दे क्रियू गी लेइयै जाने आले अंतरिक्ष यान स्पेस एक्स डिजाइन जिंदे च भारती वायु सेना दे ग्रुप कैप्टन शुभांशु शुक्ला बी शामिल न। कल भारती समें दे मताबक संजा 4 बजे अंतराष्ट्रीय अंतरिक्ष स्टेशन कन्नै आईएसएस कन्नै डाकिंग होई गई। इंदे कन्नै गै कुसै पैहले अंतरिक्ष यात्री नै अंतराष्ट्रीय अंतरिक्ष स्टेशन उप्पर अपने कदम रखे न। लखनऊ च जन्मे दे शुभांशु शुक्ला 1984 च राकेश शर्मा दी डोआरी दे परैत अंतरिक्ष च जाने आले दुए भारती बनी गे न। इस इतिहासक मिशन च चार अंतरिक्ष यात्री न जिंदे च इक अमरीका, इक भारत, इक पोलैंड ते इक हंगरी थमां ऐ, जेहड़े धरती दी निचली कक्षा च 14 दिनें तगर वैज्ञानिक शोध करगन। शुक्ला होरें भोजन ते अंतरिक्ष पोशन कन्नै जुड़े दे उच्च कोटी दे प्रयोग करगन। अंतराष्ट्रीय अंतरिक्ष स्टेशन कन्नै सफल तरीके कन्नै जुड़ी जाने पर विज्ञान ते प्रौद्योगिकी मंत्री डॉ. जितेन्द्र सिंह होरें भारती वायु सेना दे ग्रुप कैप्टन शुभांशु शुक्ला ते एक्सियम-4 मिशन दी टीम गी बधाई दित्ती ऐ।

<><><><><><>

LG-APM

उपराज्यपाल मनोज सिन्हा होरें कल राजभवन श्रीनगर च सर्वदलीय बैठक लाई। इस दरान श्री अमरनाथ जी दी यात्रा दी तैआरिएं बारे चर्चा होई। इस बैठक च मुख्यमंत्री उमर अब्दुल्ला, बीजेपी थमां सतत शर्मा, निर्मल सिंह, कविन्द्र गुप्ता, कांग्रेस थमां तारा चंद ते गुलाम आमीर, नैशनल कांफ्रेंस थमां जे.एस.आजाद ते शौकत अहमद मीर, सीपीआई(एम) दे मोहम्मद युसूफ तारीगामी, अपनी पार्टी थमां अल्ताफ बुखारी, पीडीपी थमां इलतजा मुफ्ती ते जेकेपीडीएफ थमां हकीम मोहम्मद यासीन शामिल होए। उपराज्यपाल होरें सब्बने गी सैह्योग करने लेई आखेंआ। मुख्यमंत्री ते होरने दुए यात्रा गी सुचारू बनाने लेई हर संभव सहायता दा भरोसा दोआया।

<><><><><><>

CM-NCC

मुख्यमंत्री उमर अब्दुल्ला होरें एनसीसी कैडटें गी आखेआ ऐ जे ओह जम्मू कश्मीर बारे उंदे सकारात्मक अनुभव सांझा करन ते मुख्ये च शांति, एकता ते आपसी सौहार्द दे दूत दे तौर पर कम्म करन। श्रीनगर दे बदामी बाग स्थित छावनी च एनसीसी दे स्पेशल इंटीग्रेशन कैंप 2025 गी संबोधत करदे होई मुख्यमंत्री होरें एह गल्ल आखी। इस शिविर च मुख्य भरै दे बक्ख-बक्ख हिस्से थमां कैडेट शामिल होए न। उनें आखेआ जे इनें कैडटें दी घाटी च मजूदगी मकामी लोकें दा हौसला बधा'रदी। 12 दिन दे इस कैंप दा मकसद राष्ट्रीय एकता गी बढ़ावा देना ते युवाएं बश्कार सांस्कृतिक आदान प्रदान करना ऐ।

<><><><><><>

PM-MKB

प्रधानमंत्री नरेंद्र मोदी होर इस म्हीने दी 29 तरीक गी आकाशवाणी पर प्रसारित होने आहले अपने माहवार रेडियो कार्यक्रम "मन की बात" राएं देश-विदेश दे लोकें कन्नै अपने विचार सांझे करडन। एह इस कार्यक्रम दी 123मीं किश्त होग। लोक इस कार्यक्रम लेई अपने विचार ते सुझा टोल फ्री नंबर 1800-11-7800 पर सांझे करी सकदे न। लोक अपने विचार ते सुझा नरेंद्र मोदी ऐप जां फही My Gov open forum पर भेजी सकदे न। विचार सांझा करने ते सुझा भेजने दी खीरी तरीक अज्ज खीरी तरीक ऐ।

<><><><><><>

CS-CI Tag

मुख्य सचिव अटल डुल्लू होरें कल सिविल सचिवालय श्रीनगर च नवाचार प्रौद्योगिकी ते शासन सरबन्धी इक उच्ची सतह दी बैठक दी अध्यक्षता कीती। जम्मू कश्मीर च कुशल, जवाबदेह ते तकनीकें कन्नै लैस शासन चलाने लेई इंदी भूमिका पर लोह पाई। मनुक्खी संसाधनें दी लोड पर जोर पांदे होई मुख्य सचिव होरें माहिरें ते पेशेवरें दा समेंसिर चयन करने पर जोर दित्ता। उनें सब्बने मैहकमें गी सखेत्रुएं गी शामिल करने लेई गलाया। मुख्य सचिव परियोजनाएं गी तोड़ चाढ़ने लेई समर्थ च बाद्धा करने आस्तै साढ़े 4 सौ अधिकारिण गी सिखलाई देने दे महत्व गी उजागर करदे होई निर्देश दित्ता जे इक व्यापक क्षमता निर्माण अभियान शुरू कीता जा।

<><><><><><>

Plantation Drive

पर्यावरण दे राक्खी ते स्थाई शैहरी विकास दी दिशा च इक मीत्वपूर्ण गैंह तैहत जम्मू दे डिप्टी कमीशनर सचिन कुमार वैश्य ते जम्मू नगर निगम दे कमीशनर डॉ. देवांश यादव होरें कल जम्मू दे सिविल सचिवालय कश जम्बू लोचन चौराहें च बूहटे लाने दी इक मुहिम दी अगुवाई कीती। एह पैहलकदमी क्लीन जम्मू, ग्रीन जम्मू अभियान दा इक हिस्सा ही जेहदा मकसद थाहीर दी हरा-भरा बनाना, जलवायु परिवर्तन दे माड़े असर गी घट्ट करना ते मकामी लोकें च एहदे प्रति जागरूकता बधाना ऐ। जारी मुहिम लोकें च जम्मू गी होर मता हरा-भरा करने दी दिशा च योगदान देने लेई प्रेरित करा'रदी ऐ।

<><><><><><>

DC Kishtwar

किश्तवाड़ दे डिप्टी कमीशनर पंकज कुमार शर्मा हुंदी अध्यक्षता च कल हाड़ आली स्थिति कन्नै निबड़ने लेई तैआरिएं ते प्रतिक्रिया रणनीति दी समीक्षा करने लेई इक महत्वपूर्ण बैठक लग्गी। डिप्टी कमीशनर होरें सब्बने मुत्तलका अर्जेसिएं गी निर्देश दित्ते जे 24 घंटे कम्म करने आला कंट्रोल रूम कायम कीता जा। डिप्टी कमीशनर होरें इस गल्लै पर बी जोर भरेआ जे आपदा आली स्थिति च राबते लेई एमरजेंसी मिंबरें गी सब्बने सोशल मीडिया सनें सब्बने प्लेटफार्मे पर सांझा कीता जा तां जे जरूरत आले समें दरान लोके गी राबता करने च कोई परेशानी नेई होए। एह्दे अलावा डिप्टी कमीशनर होरें सब्बने मुत्तलका मैह्कमें गी निर्देश दित्ता ले ओह् अमले ते मशीनरी गी कुसै बी आपदा आली स्थिति कन्नै निबड़ने लेई तैआर रौहन।

<><><><><><><>